

COMUNICÂT STAMPE

MINORANCIS IN VAL DI AOSTE: IN RÊT PAR FÂ CUINTRI AL ATAC AI DIRITS

Valsavarenche (AO), ai 7 di Setembar 2012 - Puedie la Rêt jessi il strument tes mans des comunitâts linguistichis di minorance bon par meti une brene ai preocupants segnai dei guviers centrai cuintri lis autonomiis, cuintri la aplicazion des leçs che a prudelin dirits e, duncje, in gjenerâl cuintri il progredî de difusion e de prosperitât des lenghis e culturis locâls?

I rapresentants des disevot minorancis che a partecipin al "Festival des Peuples minoritaires" che si son dâts dongje te Valsavarenche, la valade indulà che al nassè Emil Chenoux, il pari dal autonomisim valdostan, lu crodin pardabon e lu àn sotliniât fuart te vierzidure de manifestazion inmaneade de Regjon e che e jere incentrade propit sul teme des "Rêts di solidarietât te ere di Internet".

"La crisi economiche e la necessarie e oportune "spending review" no puedin diventâ pretescj par atacâ i dirits costituzionâi e la legjislazion comunitarie in materie di minorancis", al è stât rimarcât ae cunvigne, indulà che e je tornade di atualitât la propueste di costituzion di un coordinament atîf tal web che al rivi a fâ masse critiche e pressâ il mont de politiche e lis istituzions.

Par fortune a cheste cuarte edizion dal festival, nassût propit tant che ocasion di incuintri e dibatit jenfri lis minorancis, il Friûl e la lenghe furlane a son ospits di onôr (cun francofons de Louisiane e i Irlandês dal Sud). Une posizion che e permet di ricuardâ "urbi et orbi" ce che la lenghe e à vût di subî di bande dal Guvier tal setôr de istruzion.

A ilustrâ la storie e la evoluzion des politichis linguistichis pe tutele e promozion dal furlan al è stât William Cisilino, diretôr de Arlef Agenzie regionâl pe lenghe furlane.

Cisilino al à spiegât il grât di tutele juridiche de lenghe che si è rivâts insom a viodi ricognossût, ricuardant i plui interessants dâts percentuâi (che, al à anunciât a vignaran in curt inzornâts daspò dîs agns dal ultin censiment socio linguistic) e al à sotliniât lis plui decisivis cuestions par chel che al inten il contenziôs cul Stât.

Segnâi di preocupazion a son stâts manifestâts ancje dai altris rapresentants des minorancis storichis ricognossudis de 482, ven a stâi de Sardegne e des

minorancis franco provençâls e ocitanis che a àn indicât te plui gjenerâl bataie pe une juste ratifiche de Cjarte europeane des lenghis regionâls la strade par imponi al guvier la difese dai dirits des minorancis tai respetîfs teritoris.

La cunvigne "Collège d'etudes fédéralistes" e je stade inmaneade de Fondation E. Chanoux dutun cu la Regjon Valle D'Aosta e a à vut tant che protagoniste Isabelle Regoni che à fevelât dal progjet "Minoritymedia", une ricercje de universitât di Bordeaux sui media in vot paîs europeans (comprendude la Italie).

Altris relatôr de cunvigne moderade di Alessandro Celi (Fondazion Chanoux) a son stâts Daniel Fusinaz, che al à ilustrât lis implementazions dal portâl francoprovençâl "Gnaléi" e Erin Stickney, rapresentant dal Codofil, il Consei pe difusion dal francês tal Stât american de Louisiane.

Vuê il festival si vierzarà uficialmentri in place Chanoux tal cjâf lûc cuntun forum internazional, lis sfiladis tal centri de "Brice Miller and the Mahogany Brass Band" de Louisiane e il concert al Teatri Roman dal famôs grup de musiche tradizional irlandese "The Clannad", introdusût dai locâls "Patoué Eun Mezeucca".

Elisabetta Pozzetto

Regione Autonoma Friuli Venezia Giulia
[ARLeF – Agenzie Regionâl pe Lenghe Furlane](#)
Piazza XX Settembre 23
33100 Udine

0039 0432 555724 fax 0432 204158
mob 0039 335 8002058